

Odluka kojom se proglašava Zakon o izmjenama i dopunama Izbornog zakona Bosne i Hercegovine

Koristeći se ovlaštenjima koja su Visokom predstavniku data u članu V Aneksa 10. (Sporazum o implementaciji civilnog dijela Mirovnog ugovora) Općeg okvirnog sporazuma za mir u Bosni i Hercegovini, prema kojem je Visoki predstavnik konačni autoritet u zemlji u pogledu tumačenja gore navedenog Sporazuma o implementaciji civilnog dijela Mirovnog ugovora; i posebno uvezvi u obzir član II 1. (d) istog Sporazuma prema kojem Visoki predstavnik "pomaže, kada ocijeni da je to neophodno, u rješavanju svih problema koji se pojave u vezi sa implementacijom civilnog dijela Mirovnog ugovora";

Pozivajući se na stav XI.2 Zaključaka Konferencije za implementaciju mira održane u Bonu 9. i 10. decembra 1997. godine, u kojem je Vijeće za implementaciju mira pozdravilo namjeru Visokog predstavnika da iskoristi svoj konačni autoritet u zemlji u vezi sa tumačenjem Sporazuma o implementaciji civilnog dijela Mirovnog ugovora, kako bi pomogao u iznalaženju rješenja za probleme u skladu sa gore navedenim "donošenjem obavezujućih odluka, kada ocijeni da je to neophodno", o određenim pitanjima, uključujući i (prema tački (c) stava XI.2) "mjere kojima se osigurava implementacija Mirovnog sporazuma na cijeloj teritoriji Bosne i Hercegovine i njenih entiteta";

Zapažajući da je Upravni odbor Vijeća za implementaciju mira na svom zasjedanju održanom u Briselu 28. februara 2002. godine podvukao da politički lideri i institucije Bosne i Hercegovine imaju odgovornost da osiguraju da ljudima Bosne i Hercegovine bude omogućeno da ispunjavaju svoje demokratsko pravo na slobodne, pravične i demokratske izbore;

Imajući u vidu činjenicu da se prijelaznim odredbama Izbornog zakona Bosne i Hercegovine ("Službeni glasnik Bosne i Hercegovine", br. 23/01, 7/02, 9/02, 20/02, 25/02, 4/04, 20/04) Visokom predstavniku daje važna uloga u imenovanju članova tijela kojima je povjerena organizacija izbora i osigurava se da će međunarodni članovi učestvovati u radu Izborne komisije Bosne i Hercegovine;

Konstatujući da navedene oredbe i, naročito, odredbe člana 20.1. i člana 20.2. Izbornog zakona Bosne i Hercegovine ostaju na snazi do završetka mandata Visokog predstavnika, odnosno sve dotle dok Visoki predstavnik drukčije ne odluči;

Uzimajući u obzir napredak postignut u izbornom procesu u Bosni i Hercegovini i uspješnu organizaciju općih izbora u 2002 godini;

Uzimajući u obzir takođe činjenicu da je lokalne izbore u 2004. godini nezavisno organizirala Izorna komisija Bosne i Hercegovine i da su ih finansirali isključivo organi vlasti Bosne i Hercegovine;

Imajući na umu sveukupnost prethodno navedenih pitanja, Visoki predstavnik donosi slijedeću:

ODLUKU

kojom se proglašava Zakon o izmjenama i dopunama Izbornog zakona Bosne i Hercegovine

koji se nalazi u prilogu ove Odluke i čini njen sastavni dio.

Navedeni Zakon stupa na snagu kao zakon Bosne i Hercegovine prema odredbama člana 4. tog zakona, na privremenoj osnovi, sve dok ga Parlamentarna skupština Bosne i Hercegovine ne usvoji u istom obliku, bez izmjene i dopune i bez dodatnih uvjeta.

Ova Odluka stupa na snagu odmah i odmah se objavljuje u "Službenom glasniku Bosne i Hercegovine".

Sarajevo, 4. april 2005

Paddy Ashdown
Visoki predstavnik

ZAKON O IZMJENAMA I DOPUNAMA IZBORNOG ZAKONA BOSNE I HERCEGOVINE

Izborni zakon Bosne i Hercegovine ("Službeni glasnik Bosne i Hercegovine", br. 23/01), sa izmjenama i dopunama ("Službeni glasnik Bosne i Hercegovine", br. 7/02, 9/02, 20/02, 25/02, 4/04, 20/04), ovim se dodatno mijenja i dopunjaje, te glasi:

Član 1.

U prvom stavu člana 2.5, riječi: "Osim u slučaju koji se regulira u članu 19.1 ovog zakona", brišu se.

Član 2.

U prvom stavu člana 20.1, riječi: "Do završetka mandata Visokog predstavnika, ili u slučaju da on tako odluči", zamjenjuju se sljedećim riječima: "Do 30. juna 2005. godine".

Stavovi 2. do 6. člana 20.1 brišu se.

Novi stav 2 dodaje se i glasi:

"Relevantni organi će odmah pokrenuti postupak izbora novih članova Izborne komisije na osnovu člana 2.5 ovog Zakona, u cilju da se ovaj postupak završi do dana utvrđenog u prethodnom stavu."

Član 3.

Član 20.2 briše se.

Član 4.

Zakon o izmjenama i dopunama Izbornog zakona Bosne i Hercegovine objavljuje se u "Službenom glasniku Bosne i Hercegovine" i stupa na snagu osmog (8) dana od dana objavljivanja.